


丑



宋程允山先生集

北山集卷第一

古詩一

雜興十首

一日復一日百年如此耳那將千百計來日何窮已
 逝者不可追來者安可知正恐聞道晚勿言功用運
 誤點成駁牛妙技有餘賞作意盡虵足至今猶撫掌
 君看人間事類此或往往浩歎可柰何悠然起遐想
 中夜忽自省昔我今是非音聲故如昨齒長鬚滿頤
 有人夢中言子念無乃癡今猶昔人耳昔人安在茲

信安程

俱

川環
福地
珍藏

程允山

信安程

濯濯簷下溜刁刁樹間鳴蟲號百鳥開小大各有聲
聲多不留礙響振元無形何殊百千炬光影各自明
胡葵向晨照日引一尺長松栽四五年擢幹未出墻
溥溥露方晞借此顏色芳各留一寸心試待九月霜
春鳩一何拙社燕一何巧天陰逐其婦飲啄聊自了
嘶泥亦綢繆託此華廈好物生固有分巧拙均一飽
穆穆新橐結補此茅屋漏問云力田人歲事苦耘耨
終年手足胝得此以自覆香杭一過眼糠覈餘滿竇
昔年過吳江戀戀不能去臨江塵思盡廓若掃翳霧
茲爲三年留已厭波濤怒乃知常人情趣新方捨故

軋軋田邊車卷卷不得休出之一寸痕益以幾尺流
扶提暴中野強作田家謳車聲真哭聲天遠將誰尤
少小思振奇頗恨身不長身長益多累信與憂俱生
回思二紀間浪使儵忽爭誰能補黥劓反我孩與嬰

秋思

涼颼動秋思中夜一長歎月回西南隅澹若霜華亂
清甘汲露井起坐待晨盥母爲事安眠急景不可玩
午陰日以薄墜葉黃且枯遶舍足榆柳鳴條眼中踈
芸芸悴方榮髮白不再青所以姑射子騎龍出蒼冥
殘炎如老健雖壯寧復久新涼若涓流已快執熱手

蕭然發朝暮羽扇一芻狗移奪定誰尤論功亦何有
飢蟬得清風向夕聲更急林間鳴絡緯長伴幽蛩泣
青燈對青編秋氣已復然誰謂月有恨正應人可憐

吳縣游靈巖

春物已如許放舟出橫塘扶橈漾淥漲迨此白日長
草木有佳色欣欣弄浮陽幽禽靜相呼乘和自翻翔
春風不着人浩浩吹我裳終年思煩促於此興未央
捨舟得平地陟彼萬仞崗明霞墮山西夜氣鬱尉已蒼
豈無從我遊夾道鬚髯張風來得好語落落隨低昂
幽堂掃禪榻靜對燈燭光身輕浴新出境寂慮欲忘

虛窓忽含曉睡起日照梁羣山發春姿秀碧澹以芳
晨光晞薄露草樹滋幽香徜徉尋昔遊步屨循長廊
振衣一長嘯寸目了八荒上嗟百世基竟坐一笑亡

見劉禹錫詩

當時館娃地今作選佛場乃知諸夢境遁化豈
有常飄然詠歸歟此適頃未嘗重來會有興肯使墮
渺茫旁人挽予言借問身閑忙吾方有公事子去無
相妨

古風送錢定國顯道

登崖無坦蹊下瀨無平波尋常即千里奈此巖阻何
朝躋青陽破暮入黃牛渦見之令人老况乃身所過

賴有萬頃陂洗我心煩病

中林有幽華乃擅一國香終年不自見道路草木長

應知當門病要謝移根傷終恐荷鋤人朔風襲流芳

紉之瓊瑤佩致彼君子堂永捐盈腰艾扈服不可忘

扈恐作戶楚詞云
戶服艾以盈腰

送傅國華墨卿赴保塞簿

閉門坐咄咄出門長太息問之何爲尔歲月亦可惜
褰衣臨大河跬步燕粵隔回車撫長劔玉食慘無色
男兒重性命慷慨輕遠適非關飢所驅豈爲五鼎食
國華浙東來觸熱向河北行行四千里易去若持被

直怪無懷土念語軟心似石要令飽辛勤不使鳩安

逸顧余一畸士束髮守編策夜闌相對語耿耿氣橫

臆保州幾窮塞百里望疆場蕭蕭易水寒壯士不復

得易水在安肅軍之北安肅保州隣也君家義陽侯介尺八建雄績時平廓

信度胡頸安足赤深藏百僚底聊作青衫客吾徒會

時須要子繼休奕傳

過方子通惟深

白日苦易晚我懷多隱憂憂思劇春浸浩漫不可收

出門欲有適舉步且復休塵中等膠擾念此將焉投

駕言城東北闔閭即巖丘是中有幽人厲志凌霜秋

寸田荆棘盡不假斤斧修門無雜車馬一飯乃見留
虛堂芝朮香下有百尺虬蒼陰匝平地老幹森下樛
堂中羅酒漿耿耿燈燭幽四天黠無光萬籟肅以擘
炯然坐相向更僕語益適我身動乖迕夢寐喬松遊
常恐在泥滓永爲天所囚會當從之子濯足萬里流
夜聞壁間蛩鳴有感二首

露草亦已冷寒蛩獨無依入我壁間鳴出處定有時
誰言秋氣高感此動物微我欲以意續一歎三嗟咨
耿耿夜將旦殘星月邊稀

寒日苦易短燕鴻暮何之念爾捨沙漠爲此萬里飛
銜蘆不厭高繫書端寄誰寒聲夜相呼客子涕已垂
聲斷腸亦斷歸期各何時

夜半聞橫管

秋風夜攪浮雲起幽夢歸來度寒水一聲橫玉靜穿
雲響振疎林葉空委曲終時引斷腸聲中有千秋萬
古情金谷草生無限思樓邊斜月爲誰明

讀神仙傳六首

騎龍上天入太清繼世而往在我盈握鈴而呼大司
命至非使者走折脛乃知神仙非智巧積功累行如
邠鎬專懷邪辟祈長年誰言淮南鷄犬飛上天

安期生赤玉鳥遺之東海濱千年求我蓬萊下祖龍
豈是千年人安期一量鳥葱嶺一隻履茫茫九州在
泥滓至人去之如脫屣吁嗟祖龍蕭翁寧悟此
鯉魚腹中有隱符白魚腹中有素書鞭靈走石纜一
戲騎麟上天亦徒耳誰能解衣涿水中使人呼指赤
鯁公
莫作龍眉山頭客三百年不得作直故應未辦作李
公投身百斛旨酒中鼓琴先生有怒色有愛終當爲
物役江都王勿預人事俛蟲膏血使誰從汝索
崑崙下有三頃田赤烏玉兔蹲兩邊下有烏靈木灌

以華池泉耕之不用一寸鐵使公家富不可說如坻
如京會有盡萬物皆吾橐中物搏泥作金何屑屑
胥門着蔡經市門着梅福我爲松江吏與汝相望亦
相逐高冠長劔衛士從有口底事使蠟封此身況不
爲陳尉就公蠟封三尺喙不能擲米作珠爲狡獪

古釣臺歌送阮閱休美成公檄浙東

餓夫一往西山空攫金胠篋清晝同東方作矣事何
若玉柙未解裙襦中排肩炙手日車午暮夜掉臂目
送西飛鴻謂言冰壺不受汙正似馬耳經東風我思
一人去我千載乃在淞水之東富春瀨山嶽嶇兮矗

雲漢溪流喧逐白石亂瀨聲盡處萬尋碧蟠蜿蜒兮
守斯人之故宅旁人指山名釣臺下視九土氛黃埃
投竿百瘡何足道直拂三珠挂瑤草彼一人兮皎獨
立清風爲神冰爲骨佩瓊蕤兮結明月紉蘅蘭以薦
枕兮服龍淵之無缺羊裘蒙茸溪水旁大勝被袞升
明堂劉秀發兵誅不道氣壓昆陽纔一掃登床撫腹
坐太息始信赤符非至寶君房素癡定不癡致位鼎
足何其危阿諛順旨胥領絕安知直言身見殺我昔
客新定挂帆七里灘整冠拜祠下巖巖千仞層臺巔
神遊八海極髣髴聆其語但覺萬古松風寒滔滔舉

世無不可正自喪我非母我嚴灘水清山翠微貪廉
懦立歸來兮奎蹄絮縫不可以久棲

即事戲作四首

老烏作巢一何拙柳條垂絲今禿缺銜枝復墮苦饒
舌編條作巢枝錯節老烏柳好汝勿傷藏烏待得春

葉長安巢令汝着哺母密葉更能庇風雨

齋前數柳樹爲老烏取新條作

巢幾盡

黃雀黃雀飛相逐相呼門前啄遺粟啄粟飽即休有

人挾筲掃泥待作粥

數日門外輸苗遺粒狼戾黃雀喧集貧家小兒爭掃去謂之掃泥米

鶴唳固有似云何啄泥取蚯蚓蚯蚓食泉曾不惡鱗

鮪蜿蜓尤不忍何如忍飢向芝田腥涎溷尔不得飛

上天

畜一鶴頗食腥穢可厭

烏啼未必惡麾去恨不早鵲噪兩耳聾主人亦言好
安知一喙鳴喜戚自顛倒朝來群鵲噪不已童稚無
知助吾喜群鵲自與烏爭巢慎勿喜歡真誤爾

齋前群鵲時噪

謝人惠硯

帝鴻墨海世不見近愛端溪青紫硯溪流見底寒且
清光凝淺紺淵之精斧柯千古遺仙局雲暗半山含
紫玉割雲鏡玉巧如神龍尾銅臺可奴僕君來自南
數千里不載珠璣如意以芊芊溪草裹石硯文字之

祥直送喜明窓大几墨花春爐山吐蘭千穗雲虛中

含默靜相對那復草玄驚世人

劉禹錫有端溪石硯人間重贈我應知正草玄之句

穹隆葬事回邑有感

生別萬里餘會面終有期死別不轉眸一朝千古非
白日光在天玄陰閟泉扉盈盈閨中秀土化成枯甍
冠筭共甘苦謂見素髮垂那知死生變不待桑蔭移
室有病時茵篋有嫁時衣了了眼中事閑粧靜容儀
垂楊手曾折為我當春稀迅流無迴波落英無還枝
空房間無迹新墳草離離傷心北門道回來不同歸

遊華藏此君亭

山空木葉脫霜露路日已寒蕭蕭歲寒子勁氣不可干
下庇秋草根上棲衆鳥安煙梢掠雲漢過者仰首觀
云何九衢鏤有此五畝寬况當祇洹舍永謝翦伐嘆
高人名此君千載莫敢刊豈同渭川封肯汙秦氏官
鷓鴣未來食螟螣或見殘今年江淮飛蝗至食竹葉一空終然保常操特
立良獨難我疑卞忠貞鐵石瑣肺肝遺骸寄此地藏
碧留餘丹精誠入毛髮化此千琅玕見之發三嘆臨
風肅衣冠

獨遊保寧鳳凰臺

飢鷄嚇腐鼠鳴鳥久不聞一登鳳凰臺目送蒼梧雲

山川麗晚日氤氳發餘熏覽此萬里輝振我衣上塵
前瞻翠回環極望天無垠低昂玄盤踞佳氣或未堙
山坳指樓觀青骨今尚神馳煙謝逋客三徑久已榛
長松眇如薺下有高世人斯人不可作此道日以新
回睇白鷺洲長江瀉沅沅遙岑出澹碧不辨楚與秦
淮西在江左時符秦地也我行適淮西出處難重陳豈無羈旅歎乃有
山水因茲遊頗幽獨作伴影與身寧辭足力盡聊使
眉頭伸憑虛默自計逝將祈孔賓寄聲華陽老異日
期相親

過劉姓園居 甲申

負郭三頃稻並田五畝園人生如此足安用華其軒
親戚居南陌交遊在東村有酒輒共醉傾輸見情言
三徑雜桃李九畦時蘭蓀黃甘百頭奴碧梧萬支孫
山供景無盡石映溪不渾桑麻中饋任布刈隣翁論
下以活妻孥上以奉清溫時從赤松子亦訪吳市門
嗟我抱此志十年若朝昏家山眇天末松菊豈復存
茲園臨官道坐笑車馬奔前山復場圃疏築隨坳墩
我來適春穰亂眼紅青紛恍然動鄉思夢寄東飛雲

宿海會寺

萬杉堆青沒山骨雲埋七峯時出沒飛泉拂石瀉哀

山中村酒詩佳

脩此應作脩此俟考

湍下有萬古蛟龍窟藏頭睡熟呼不起地坼三年蝗
蝻出千山脈理清清甘一罇涓涓流石液同遊况與
惠詢輩許王簿遠首座紉屐振衣何勃窣大門當前新築道
跨水曲欄歌突兀春鳴輾輾趁朝炊水剛懸流機械
發楮筇對此自三嘆抱甕老人長搢搢却坐幽堂忽
浩歌回首已失西山日

山谷寺

初梁白鹿先生請以為觀志公飛錫先之遂為僧寺今有飛錫泉今靈仙白鹿所基也常苦無水而

山谷獨有餘寺有太宗真宗仁宗三聖御書歲度僧七人

竺法暨華土出傳骨與書金僊屹不動坐使四海趨
山川第一勝盡為佛者居苾芻慧灑之谷蛟鸞互盤紆

一爲飛錫先方士回雲車顧眄榛楚地翬簷湧層虛
英靈護泉脈飲此白足徒當年蓋國衆莫挽碧眼胡
傳衣到三葉此地滋焦枯異氣生傑閣宸奎動天樞
神龍盡傾向寶此明月珠三聖陟帝所雲章久寧渝
餘霑沾及婆塞歲復六七夫堂中老沙門古態幾皇胥
定知黃龍窟不着點額魚長老嗣黃龍南門開兩山陜萃然七
浮圖沙步對石麓溪流清且徐危甍隱深樾間見碧
與朱寺前隔溪山上有亭林間朝來雨脚斷雲氣尚卷舒懸知磴道
滑一水不復逾州家有造請上馬及未哺

石牛洞

山上有左慈丹井洞有荆公題

陽城山頭遽如許金華山中呼不去癡牛失脚墮天
河共向空山飽煙霧阿瞞安知眇道士丹井至今存
故處瑋淙萬古穿石斷峽東奔流開山塢鬼竅上鬱
千仞勢洞下坡陲無塊土文公古句驚舊觀拂拭蒼
莓增媚嫵亦欲磨崖放楚狂掃迹政恐山神怒

望九華

甲申

船發大雲倉五十里許顧江南衆山中有數峰竒爽
特異一見即知其爲九華問篙人果然因知褚季野
於廣坐中識蓋萬年正應如此作詩一首

卷簾坐對江南山掠眼送青來疊疊雲泉肺腸久厭

飫挂頰悠然聊復尔奇峯遠澹忽四五爽秀駸駸逼
窻几平生九華盛名下一見定知具是矣非關目力
覩天奧正覺群山如聚米好山如人有高韻不獨江
州孟公子直緣佳處無仕選落莫道邊同苦李大是
忘年耐久交藜杖青鞵結終始

谿行歎

潏潏石間流落落灘下石相因成悍嶮日夜更拒激
化爲百雷車轉入千丈碧推舟上磊砢盡日不尋尺
我行三伏中正自澁如棘于時久不雨陽炎去劇炊
炙谿流僅如綫但見沙渚赤透迤呼地港百步涉重

磧迢迢神亭瀨泉盪盪無遺力此身誠不貲此日良足
惜胡爲弃分陰盡室寄難阨長謠飛仙章忼慨三歎息

山中對酒 乙酉

秋容澹青山爽秀雨皆足清溪照千仞空翠疑可掬
何年顧兔窟桂子墮山腹老香散深林屑玉綴黃粟
朝來客衣動一葉下空谷客心如棼紛日月共煩促
胷中尚磊塊陶寫賴新淥要當酒千鍾澆我愁萬斛
顧有獨醒人脩然倚枯木

二月二日富陽城東

閉門三日坐聽雨不知春光已如許桃花弄晴成艷

笑穠李怯風猶半吐當年赤白桃李花恨無佳人絕
代歌無事對花豈易得有酒不飲將如何
一春何許最佳處柳色初勻思殺人風揉雨練不可
觸明綠映空顏色新舊雨來時花未齊今雨一過花
團枝明朝試踏城西路已復可憐枝上稀

桐廬道中書事

一星熠熠初尚微俄頃滿天如灼龜溪流黯黯四山
黑怒芒當空唯太白舉頭仰書天漫漫飛星縱橫絕
河漢新月未高不可見終夜起坐發三歎

題張太丞明園亭

京華真陸海聲利之所闕向來山林士往往去不還
濡足未肯已沒身何足歎張侯翰林客金龜著朝班
生平用一指談笑起廢殘紛紛多廬子名譽莫敢攀
五十未云老幡然歸故山歸來謝奔走治此五畝園
養樹如養生斤斧不浪干醫國花如醫國疾察標見其源

花譜有
醫花法

清瀾爽氣日多佳西山挂簷端安能九衢內髀肉磨
韉鞍我今坐竒窮進退坎井間違已恨紆轡長飢思
抱關當時彭澤令四壁唯瓢箪折腰未爲辱徑去曾
無難而我亦何者栖栖猶強顏

送崔閑歸廬山四首

白露下修竹當窻作秋聲冷然拂商絃客子中夜驚
振衣一長嘯下瀨如飛星昔者去草堂新松蔭軒榮
別來今十年霜華着青青想見溜雨姿森蒼舞蛟鯨
歸歟當及健羈栖亦何營

琅琊山中水韻入三尺桐琅然醉翁操發自玉澗翁
流泉不成音寫寄十二宮醉翁不可見妙語聊形容
嘗聞三峽泉上與天漢通請君記餘響相彼玉珮風
此聲儻可繼那復有此公

論世得師友陶公乃其人清遊入夢寐廬山真夙因
迩來二十年浪染衣上塵陶公去已久歎如空中雲
廬山如高士可望不可親坐想虎溪路聞鐘動微顛
永懷爐峯頂飛煙發朝暉羨子歸故隱茲焉畢其身
吾意久規往當從君問津

吾友胡少汲結廬皖公城瀟山有小隱背負紫翠屏
前臨一溪水可以濯我纓欲分青山半留我谷口耕
信美非吾鄉翩然遂宵征聞君草堂處亦復占地靈
虛簷倚蒼崖下有玉澗鳴樂哉不可到因君懷友生

黃魯直有食甘念慈母衣綻懷孟光之句
用爲韻作五首以寄旅懷

據梧不必席，裹趺不必舄。飢來太倉陳，飽勝列鼎食。
願言伏嵒巖，保此稼穡甘。正使能已百，寧當籠暮三。
凋林如白鬢，色變不可染。招提據木末，清凜絕浮念。
俯窺群啄雞，仰見烏哺兒。斂手不敢嚇，無爲傷彼慈。
吳山視諸山，聳秀若諸母。上有一段雲，使我屢回首。
激水向浙水，涼飈生遠澗。中有一雙鯉，爲傳我所思。
高堂有華髮，游子行當歸。歸歟不可緩，霜露沾人衣。
棼絲不可經，百結不可綻。吾今成放浪，豈復事編簡。
羈游無好懷，坐看西日頽。壯心正不已，亦復何爲哉。
伯鸞未山棲，俯首愧賢孟。一朝相告語，矯首謝三聘。

謝公卧東山，故有經綸興。夫人勸之仕，擁鼻作僮詠。
終然爲時須，起攬晉國柄。古人重行藏，二士聿有光。
吾志屬有在，姑安此糟糠。

有美一人 乙酉

有美一人在，昭君藕絲爲衣。蘭作裙，君初顧言淑且。
真直欲載以黃金輪，人心變化如浮雲。明粧覺暗笑，
作嬾何當還之承華茵。令君宴寢凝清芬。

有美一人在，煙汀朱顏朝滌。玉壺冰，素手暮理朱絲。
繩語言窈窕，丹鳳鳴坐持。紈扇睇秋螢，何當還之翡翠。
屏爲君把鏡，整衿纓。

有美一人在南浦月明採珠光照渚
瑤衣被體金索縷獨抱幽寒沫
煙雨何當置之白玉宇爲君歌陽春

激楚

有美一人在南國以下四首亡時鄒志宇在昭州曾子開在汀州陳瑩中在合浦

辯師鼓琴

上人芒屨麻爲衣常修如幻三摩提
但依三業作供養坐見八德金沙池
是中寶網間行樹微妙音出難思
惟師從定觀去起奮迅寫之三尺桐
與絲枯桐攷然若空谷人倚繩牀
支槁木枯桐槁木靜相向中有世
間無盡曲曲中有曲非宮商及門但
覺聲琅琅罷琴一笑各揮手庭樹微
風清夜涼

山中秋夜 丙戌

夜氣挾秋至颼然驚戶庭空山峇清
漏客夢忽以醒林梢月未墮流光委
踈樞冷露濕山桂寒旌動幽馨整衣
坐蒲團破屋呈稀星我身本無涯寒
暑飽所經以彼泡電境勞此草木形
吾猶昔人耳不與寒暑并蘧然返初
枕入境已兩冥

賦長興錢圃翁詩

學書要不成學圃苦不早向來執戟
郎何似於陵老我無拏雲意所念在
一飽閉門種蕪菁抱壑澤枯槁荒畦
財一席嚙嚼到春草頗聞長城翁八
十顏色好

城西有寬閑終歲常却掃安得五畝園如翁一生了
秀州沈珪漆煙最善持葉翰林詩來求余
詩爲作一首

白頭柱史寥陽居浮提龍檢封金壺千金寶液出方
外灑作三元雲篆書至今道德五千字一一破闇如
明珠安知此老天地祖聊遣二化爲詼娛華亭老工
入吳市戲以淳漆滋松腴壁中科斗何足道勒崇正
欲遵河圖故令墨客從毛穎玉堂伴直鄰清都如椽
之筆吐光燄賡歌紀瑞無時無却分圭璧到蓬戶寂
漠著書憐腐儒

漢光武覽河圖議封禪
初欲以漆書玉牒云

吳下去冬不寒春不雨人以為病城中火
災相仍自十二月至今凡八九發雍熙佛
寺災勢尤甚閭里訛言相驚往往徙貨泉
載家具日爲避火計二月乙巳郡守以承
天佛寺慧感神像供府第爲佛事禳禱是
日雨明日雪丁未又大雪農事有初火怪
庶或熄人心稍安作詩記其事

飛蟲滿空冬不冰迎春草木皆天榮
輓轡續綆楹桷燥緋衣老人白晝行
城中一日二三發徼巡司武徒
縱橫化城海藏湧地出耀眼金碧明
青冥中宵瀕洞

半天赤一彈指頃隨煙升重雲仙人具悲智脫屣矜
麗依無生千年吳地赴緣感疾甚景響從形聲入塵
應供始敷坐一雨便覺敲塵清黎明密雪灑四澤灑
氣交徹何晶熒句芒蒙潤亦助喜眩轉鼓舞隨飛英
畢方褫魄走荒外雖有光怪何由呈衡茅倦客正高
卧浩歌黃竹飢腸鳴妻孥號寒不敢恨且尉南畝滋
春耕

和葉翰林阻雨楓橋

白雨下車軸江湖與天鄰渾流已橫潰川陸無行人
蕩蕩淮楚舟篙櫂動蕭晨淹留寒山寺河灣俯清淪

虛堂夢春草落紙佳句新長嘯寄遐想深談破無因
外道無泊無軒裳累但覺山林親遲遲去魯意欲駕還
因論逡巡陰霖固無限所念商農迤乃知君子懷絕出世
俗塵

天寧潛老以山中春莫三詩投鴻慶尚書
末章見及次韻荅之

大空無故新春物自來去風幡有時轉霜鐸深夜語
芸芸無定在榮悴更彼此誰於百草頭了不挂絲縷
當年白尚書居士衆稱首魔軍坐調伏消散如拉朽
何如丹陽侯法鼓開聽牖方當與天遊豈復爲物囿

尚書比閱藏
經深入佛海

踉蹌鶴阿師遮眼寄經籍苦吟思島可達觀泯儒墨
高軒時一過聲解帶有餘適頽然後車入大瓠歎五

石孟郊贈無本云有時踉蹌行人驚
鶴阿師可惜李杜死不見此狂癡

北山小集卷第一

墨池



北山小集卷第二

古詩二

泊義興長橋

信安程俱



俠骨久已朽南山長上於菟當時老蛟窟遺種今有
無我來適秋成場圃收刈初年豐似足樂薄酒儻可
酤田家復何事父老仍愁吁滔滔五濁海所向誰當
娛長年得強健且食清溪魚

遊善權寺

放舟荆溪上溪水清且徐雲中離墨山慘淡初有無

捨舟並松麓下直浮屠居竭來東軒上爽氣已有餘
飛來定何年無乃與此俱奔流漱庭下比竹梁寒渠
山深絕凡境物物清以臞蕭森倚巖秀天矯懸崖枯
幽禽發寒唳響振高林踈我行亦良苦却步計已迂
解衣卧清晝尉我十里劬

余自衢來姑蘇省女兄竟欲歸却行音
七十里訪江仲嘉於宜興故有却步之句

善權洞

嘗聞包山境中有林屋天旁通号地脉嶽瀆潜鈎連
兹山豈其類頽洞皆中穿二巖岌山足瑄淙激奔泉
牛羊走大石吐受無窮年金堂下石液雪積如烹煎
從來米鹽稱浪播俚俗傳一洞啓山腹穹窿亦聯綿

誰題九斗字大篆仍深鐫中藏文五石屹若龍騰淵
回頭問主人謂仲嘉我輩定不凡云何逐官牒常得我
所耽向來共幽討九鑠藏芝巖而我自林屋翩然游
皖瀟洪崖儻可俯不在南山南

白馬洞

披榛不知疲詰屈巖下路俄然見深穴款偶步入巖戶
一泓窈而澄百步清以務馬人言紫髯仙白馬從此度
磷磷盡赤石丹竈遺滓汙收藏已兒啼効速勝麻護
曰知世有龍耳荒怪雜疑誤虛空如許大長嘯可平步
胡爲萬山底躑躅向煙霧

神魚泓是日與諸公流杯中如西丘故事
柳州固竒士戲好亦幽絕遠懷西丘飲千古清興發
倘佯恨無所盤俎對羈紲聊爲五里行邂逅一壺挈
神魚伏山根溇湛初一穴侵侵決寒溜沙石助清越
披莎得盤石離坐若天設實觴競乘流眩轉亦飄瞥
爭持或三釂遇坎時一蹶歡來朱碧亂笑罷巾帽脫
相望西丘游詎易議優劣

九斗壇

善權山中

萬族同一垢齊州集微塵高靈不來下馱此濁惡薰
從來築壇處往往清無鄰腥羶遠人迹庶或來仙真

茲壇峙幽絕尚有古制存龜圖布八隅彷彿數元坤
黃冠道中寒寓址今祇園遊人躡其上未覺大象尊
空令恨眇史不使群龍耳奔蓋公雖未見豈乏藥與垣

張公洞

昔年京江夜飛夢投雲山仍追謫仙老嘯詠層崖巔
左盼俯無地蒼巒生紫煙當時賦幽賞妙境竟莫宣
今我來自東扶橈漾荆川飽聞張公洞怪絕駭所傳
聊從二三子一結青山緣北靈敞竒觀下矚壺中天
恍然驚昨夢了了墮我前仄徑縹危棧重扃護靈淵
竒僵玄坂倚側洞時鈎穿初疑天台聚納此一室間

夸娥運神化不隘亦不顛又疑清都客翩然下雲軒
幢旒儼行立導導從森蟬聯丹梯香霧濕玉室珠璣懸
撐虛一柱屹戴重三能騫鈇竈久已冷青驪那可鞭
香壇望八景東辰開五便坡陀忽度險宛轉漫無邊
或深如列厦或迤纔容肩高躋乍捫頂僞步欲墊泉
不知行遠近一步目九遷噫嘻此天設端在太古先
恨無少陵手寫之黃絹篇聊書夢中夢投筆一粲然

公羊粲
然皆笑

借居毗陵東門四首

客去不能寐脩然清夜闌樓居俯長川仰視天宇寬

長川濯雲漢錯落星宿秀寒青燈故可親且還對塵
編其人骨已朽千載與我言掩卷三太息虛簷清露溥
急景不可挽吾生豈無涯吳中十年舊鬚鬢亦已華
嗟我壯且老方知失林鷗欲歸巷無廬欲駕塗無車
而子亦羈滯心事如蓬麻人生無巧拙命耳將如何

吳中十年舊
謂傳冲益

猗猗隔河樹羃羃綠堦草時當長養候顏色豈不好
萌芒忽柯葉茂大旋枯槁滔滔不自知但見壯而老
人生亦草木萬化迭侵擾朱顏日夜變素抱豈自保
借居臨官道堂陰俯長河前車接來軫後棹紛相摩

我獨居其間超然嘯而歌頗從故人語安用高軒過
旁有五畝園不知主誰何時能曳屐往豈異吾山阿

和柳子厚讀書已丑

事賤及多暇居卑適無虞人間不爭地聊此謝畏途
豈無營營子孰視付一吁塵中亦何有坐聽日月逾
展卷閱千古置書忘萬殊不妨權子母亦復商有無
平生僅識字乃與憂患俱持此遊學海層臺漸積蘇
年來但遮眼頗覺心恬愉囊錢足自飽肯怖駟朱儒
起卧一塌間兀如檠株拘涼風北窻下不減愚溪愚
誰能三萬卷懸頭苦劬劬小極正當寐睡魔不須驅

虞君明暮和劉氏園居詩再用前韻作因
以叙出處之意

靖節真有道高懷俯黃園翹足北窻下超然詣羲軒
早悟俗中惡歸老三家村清詩有遺味誰知本無言
回觀一世間不辨艾與蓀青黃飾斷木冠裳裹王孫
當時甚寒餓聲利終莫渾公今二千石此事安足論
入當陪雋賢我冠宣與溫出當仗漢節登車金馬門
豈爲尚平子但畢兒女昏我今乃窮士壯圖無一存
摧頽風埃下坐見歲月奔歸歟乃其分卜勝如浮瓊
他年有餘食會見脫世紛過我五湖上一區同子雲

陪君明華藏燕集復用前韻

華藏萬竿玉何殊辟疆園城中最佳處時復過高軒
危亭望北郭依依遠人村露葉有佳色桃蹊亦無言
累累古藤陰附石如菖蓀下有小衡霍嶺岼列兒孫
方池是魚樂水作千里渾座滿北海客文追謫仙論
襟期樗散鄭目擊忘言温斯須接棊戰堅壁如轅門
不有覆舟慮寧爲注金昏越醫死更起齊霸亡爲存
日入萬籟息西騎禽趣林奔林間屹層臺此豈蕭公墩
徜徉步松月香霧時披紛胡床興不淺點綴無微雲

初秋偶題

涼風入高梧冷翠滴幽露新娥欲西流綽約一回顧
中霄汲冰華爽氣拂庭戶蕭然視天宇目送流螢度
微雲澹河漢雲漢亦容與宜搜靜中境安得此佳句

和傅冲益冬夜獨酌用柳子厚飲酒詩韻

忽忽歲晚晚幽懷寄芳樽及茲寒夜永寫我憂思煩
放杯獨長謠翕如負晴暄那知曲身直但覺冰腸温
遙思石亭林玉雪今正繁安能松窓下撚鬚哦五言
須君尋昔遊攀梅擷蘭蓀勝事難重得悠然空默存

頃與冲益遊義興諸山間甚
適石亭有梅數百株勝絕

秋日市區作

火壯亦已老朝昏發微涼高梧逼秋枕曉夢不得長
區中了無營起卧在一牀時時忽忘我徑至無何鄉
是身亦何爲萬化詎未央竭來蘭陵市三見草木黃
頗欲索其身窮年就庚桑臨淵故有羨說食誰能嘗
尚有平生懷嶮崎類癡狂佳時坐自失恐復墮渺茫
有生浪營營有志終遑遑胡爲自前却坐待兩鬢霜

客舍寫懷呈王八丈侍郎五首 辛卯

君門如雲漢可望不可攀地上挾冰子肉身無羽翰
豈無國士知執有不得言空懷激揚意歸坐自長歎
此意重千金寧論官九遷所媿誤賞音賞音從古難

長安窮居客一日一歲長况乃夏方半迢迢良未央
頽虬駕瓊車萬里飛炎光冰崖不可見仰視峯雲翔
蝸蟠兩壁間跂想深夜涼一喝非死所念之熱中腸
其誰卧清晝雲

御犯名羅千章

束髮營五斗飄然落江湖當時尚癡絕秣驥初問途
去國十五年俯仰同朝晡心隨澤中雉官作竿上魚
及茲財一遷名實初未殊且當百里地磨研城旦書
一室不可掃陰晴兩非宜朝繩汗簡編暮蚊入裳衣
尔來三日雨門有一尺泥所喜庭戶間新涼洗餘曦
貧賤無造請閉關良不癡

白雲浮東南下有姑胥臺去家桃始花歟見溫風來
久無萬金書一使羈懷開倚門有華髮扶床有提孩
雖無凍餒憂百慮不可排何當放雙槳黃流入清淮
秋將穫水行田中不復留因窵塍通溝引
水過堂下小兒以芒葦作車其上晝夜決決
不休戲書壬辰

水行山原漑平疇時當斷壺穫且收功成則退逝不
留去彼圳遂來清溝測之深咫淺可抔循除灑灑環
一丘堆沙縈石隘厥流勢激灑瀨吞黃牛誰持機緘
設中洲折芸斷葦竿駕兩輶置之不汨亦不浮六輻眩

轉無時休推行作止莫可諏孰居無事供其求迫而
後動真無尤眩轉自彼非吾謀屈伸臂頃一萬周我
無欣厭何名憂孰能觀身與此侔衆假合集成堅柔
沈輕燥溼交相仇逝川洄洑更春秋滔滔南北東西
遊死生壯老休玉囚形骸流運我則不物境萬變何
其幽

同江彥文緯江仲嘉襄度菱湖嶺游三衢
諸山道靈真出入巖谷勝絕可駭雜然有
卜築之意然此地寥閭人所不爭小隱不
難致顧吾曹出處何如耳二公皆修真養

氣精進不衰予晚聞此道又爲憂病頓挫
志倦體疲每思益友僅得靜舍安餘年資
二子以待老豈不樂哉作詩叙游且志本
末巖谷之勝實自仲嘉發之予嘗聞而賦
詩所謂武陵迷漢魏妙喜斷山川者也甲
我昔未省事俵俵如病狂仰規結繩初下歷漢魏唐
謂此紙中語卷舒在行藏功名戾契取有志要必償
跣足方不暇何由放洪荒行年冠而字世故頗已嘗
試窺竺乾書出入應帝王丘軻有妙蘊合處如宮商
形骸乃塵沫笑唾却老方蹭蹬過二紀身如浮海航

風濤浩無際寄命蛟鼉鄉外爲萬緒嬰內以百慮戕
摧顏不一偶病骨無由強初心益乖迕始覺計未良
擬追赤松遊補我黥劓創惟時子真子青衫尉南昌
亦有虬鬚翁種桃擷春芳不求飛霞珮肯受紫錦囊
至言無旁午照用寂以忘尔來又十年前却方彷徨
何殊一日暴正坐多岐亡虬鬚彼幽人物化不可量
子真日千里似欲窮扶桑安知阡陌間共此暇日長
廣文今稚川腹有雲笈章黃金儻可成綠髮不復蒼
養生百千門一一登奧堂相從崑壑間笑傲無羲皇
衢山甚竒峭不數三石梁嶽崎盡中空玉室聯珠房

九日濱未落洪波怒懷襄洄流蕩沙壤靈

犯御名忽以

彰至今衆玉聚山骨堆琳琅我空怒猊踞出谷驚龍

翔委蛇青童轍散亂初平羊懸崖勢欲墜植筍森分

行晨光乍映發紫翠雲霞張攀筍維趙公巖殿九土何茫

茫豈無太平酒浣此膏穀腸側身棲真洞跼踏仍踰

踉深行得穹窿陟降殊未央舉頭見空圓欵若來飛

光翠岳衆山底恍蕩疑無旁故應却塵汚九壘蒼屏

障斯遊固足樂質象不可詳要之大洞中太山一毫

芒回鞭靈真路林礪森相望躬幽得巖谷高青對崢

嶸地行九鑠中宛轉流泉聲琤琮瀉哀湍力與亂石

爭懸瀑或尋丈勢洶洪河傾泠泠赴深竇或如環珮

鳴或於蒼蔚中琴筑時丁丁或穿嵌崕下洄汰儲深

清或如鐵堂硤絕壁飛猿驚龍蛇走根榦薜蔓懸珠

瓔或如鈎鈎西竹樹春冬榮低昂牛馬飲偃蹇熊羆

登或如袁家渴長陰晝冥冥草間蘭芷香石上梗楠

青或如瀟谷中坡陀負崩騰或如三峽底仰見匹練

明聯綿道林麓左右臨洮城行行川谷開藹藹皋原

平冥搜已復失巧語未易名不意天壤間雲關啟金

庭向來保幽邃不挂世俗稱輪蹄固無迹樵牧或未

經吾屬豈神悟權輿標地英昏嫁會當畢衡茅茲可

營二子早聞道勤行得貞寧要收十年功不止九府
卿二樹結佳實五腴練飛瓊處靜已超靜留形要遺
形我懶百不堪寸田方力耕會從浮丘伯及此洪崖
生乘風御倒景出入撫八紘下窺冰炭士擾擾盤中
蠅三人笑相視事願良難并此志不可負無爲滯塵
纓清泉聞此言白石相與盟作詩紀勝絕亦用銘吾膺

戲呈虞君明察院暮

癸巳

三仕三已心如空一壑一丘吾固窮門施雀羅正可
樂車如雞栖良不惡曾中九華初欲成綵衣玉斧雙
鬢衰青世間何樂復過此不失清都左右卿

長安陸海知洪爐五金出入無精捕平生椎鈍堅重
質一往融液隨流珠請觀五石大瓠種正以濩落浮
江湖環中何者爲榮辱一鍾何如三釜粟坦途緩步
東方明大勝跨虎臨深谷

君明見和再作

十年接浙家屢空門無八關延五窮誰言浩浩有餘
樂世故撩人工作惡君不見韓非白首終無成至今
說難書汗青要之賦命默有制巧拙安知司馬卿
羨公腹有金丹爐凡泥六一何其掬棗梨扶疏荆棘
盡夜半北海收明珠爾來問舍浙江曲正以畫笥觀

西湖我生抗讎今耐辱貧病欲貸監河粟他年公伴
赤松遊遺我刀圭固玄谷

出北關再以前韻作寄

從公十日羈愁空超然似欲忘途窮神遊八極共天

樂浮白不應嫌客惡

元次山以不飲者爲惡客

中年偃蹇百無成唯有

見賢雙眼青狂歌時有眇道士擬賦矐仙非長卿

平生清夢遊香爐雲岵嶸确衢山擁不應近捨武林

秀僧寶况多滄海珠勝遊屢約不成往白雨連日翻

平湖公如二疏方不辱我亦三吳甘脫粟會當乘雪

叨公門正恐鳴騶還入谷

雨霽行西湖二首

晨輝麗春山雨過松竹香連峯翠欲滴動搖雲水光
長堤如卧虹草暗路已荒菰蒲破綠淨老葑日以張
念昔總角遊祗今二毛蒼物境既非昨我身安得常
半生走三吳問舍如捕風敢辭百尺樓高卧媿元龍
向來江道人卜宅湖山中安知三十年忽如化人宮
蒼雲翳脩竹飛閣凌春空主人兩鬢霜相驅車大河東
豈念五畝園方作萬里封而我志幽獨長年羨冥鴻
翻無容足地茅茨前乃蒿蓬

哭阿申二首

我生百不諧進退得坎井二毛初抱子亦足慰寒冷
珠庭照見用眉目秀而烟人言驥墮地意作千里騁
居然萬金產每見百憂醒嗟哉時夜計便欲老箕穎
安知隨泡露變滅失俄頃悲來淚成河俯仰吊孤影
遺劍日以遠刻舟那可求滄溟一漚發散滅何當收
而我舐犢悲中懷不能休推排更鬼磊棘刺生衿喉
夜夢多見之犀玉照兩眸沉憂信傷人曉覺雙鬢秋
深慙東門達恐効西河尤所念盛德後一身如綴旒

秋夜寫懷呈常所往來諸公兼寄吳興江
仲嘉八首

秋聲不關人倦客偏入耳蕭蕭舞黃葉策策振踈葦
明知壯則老搖落固其理如何石心人慨歎中夜起
蓬蒿崔沒三徑藤藟上瓜廬時聞步屨聲歎關問何如
定坐無雜語文章較精麤馬融辭東觀抗駢與世踈
顧此窮巷士華顛空工著書

屬王元規防

外監嗟已遠吾猶識其孫森然見孤韻辯作懸河翻
低頭向螢窻有類鶴在樊讎書五千卷字字窮根源
頗携未見書過我樵無煙

屬賀方回鑄

向來霜秋句俯仰歲一終人間有寒暑方外無窮通
青青千丈松不改冰雪容坐閱蒲與柳飄蕭隨雨風

寒松老益高蒲柳老益衰流萍况無蒂復與飛蓬期
却掃計不早出門欲何之

屬方子通惟深余壬午歲常過子通賦詩有云是中有幽人厲志凌霜秋

又云會當從之子濯足萬里流俯仰十二年矣愧此高人

剥啄驚牛枕軒昂見長身蒼髯如脩竹定非俯仰人
德公卧襄陽不踏官府塵此老頗似之酒酣見天真
結廬甚幽獨已辦老圃隣披榛時一來數百久益親

屬楊彝父懿孺

二士出吳下諸生有楊王相從寂寞濱無乃計未良
縱橫三千字坐可致玉堂詞章乃糠粃不直粟一囊
我媿非子雲文書昧偏旁窮居似韓子草樹亦荒涼

時能出佳句尉我秋夜長

屬王楊二貢士

物色一如此淒風薄人衣遙憐下山客增歎雉朝飛
固知難為懷舉食念齊眉勿使梨棗間纏綿生繭絲
清霜掃蕃廡豈為一草木方春萬物遂苑籞及冰谷
乾坤本平施憎愛豈有屬不應懷偏慳獨遇吾黨酷
竒窮坐透踈此事計已熟如何半世間生理常刺促

二篇屬江仲嘉仲嘉有氣節多難比有伉儷之感故云

與江仲嘉襄趙叔問子晝潘景卿景分題賦

詩以顏魯公裴晉公賀監陳希夷畫像為題

以我思古人為韻余得裴裴晉公我字韻一首

晉公護河東身退勢亦左憂心極飢渴謹議抗鬼瑣
居朝重九鼎下賊飛一竒淮西彈丸地孺子甚么麼
發兵本無難萬口無一可平淮取淄青如掇掌中果
折衝乃餘事世論豈知我天方厭唐德莫抹蕭牆禍
空餘丘禱詩千古幽淚憤

北山小集卷第二



北山小集卷第三

古詩三

夜坐

信安程 俱



飢鳥夜啼棲復起乞粟飛光透窓紙捲簾萬瓦白生
煙桂影扶踈淨如洗回腸正隨清漏轉葉下空庭亂
如霰青燈耿耿夜何其雲篆吐蘭初一線歲云暮矣
萬竅號霜天旅鴈求其曹月行虛空幾萬里群犬吠
光聲正豪蒲團瞑目空危坐逝者如斯白駒過悠悠
昨夢不可攀此身此心何日閑

春日寫懷

春風遍芳華一國盡狂醉窮閭獨不知但見長蒿薺
秋飈起蘋末一華初未墜幽懷獨先覺意象已淒厲
故知春與秋物不爲我計危絃自應悲寒木終易脆
要之夢中夢憂樂同一寐翻然詠軒丘心量浩無際

豁然閣

雲霞墮西山飛帆拂天鏡誰開一窓明納此千頃靜
寒蟾發澹白一雨破孤迥時邀竹林交或盡剡溪興
扁舟還北城隱隱聞鍾磬

二十八舍歌示錢定國顯道

吳江尉

山川不捨駢與角亢臯孤豚殊不惡安身投筆事氏
羗何異天球薦房闈人心如面各不同蛇頭蝎尾吾
安容脂韋肯効箕箒能拔劔撞斗真才雄少年食牛
有餘氣大笑文章幾女工立談寧與子虛比危冠欲
入明光宮功成築室依故丘作書重壁垂千秋宸奎
一札呼不起閉門老死如黔婁爾來養生如養胃未
羨昂精力筆吏疲神畢慮子所訶鳳嘴鸞膠誰汝試
甯以字同借用曾參忘心身亦空身如丘井心如風君言作解
皆魔鬼蒲柳松筠同盡耳三星在雷留能幾許張奉且
擊關南鼓遊龍作御雲生翼軫地蓋天從莫逆

數詩述懷 庚辰

一生共悠悠今者曷不樂二十起東山誤爲微官縛
三年瞬眸耳郵傳那久託四壁自蕭然青編束高閣
五更霜鍾動起視星錯落六律聿其周忽忽更歲籥
七哀我幽韻感念驚獨鶴八極豈不廣衰懷了無託
九原歎多賢死者那可作十里望煙村天隨去寥廓

讀陶靖節詩

吾觀靖節詩三歎有遺音卧看起詠之惛惛澹多心

盧鴻草堂歌白玉徽兮流水音聽之惛惛澹多心

欲學靖節詩慎勿學其語心源

如古井衡氣光發宇言無出言意妙語自天與譬言如

清泠淵月湛不可取欽崎阨驚湍乃若震雷鼓斯言
可深咏往往棄如土

八音歌贈別趙子雍饒之二首

金鑛具竒質百鍊出其剛石中含結綠追彼蒲穀章
絲也談有餘於道乃易方竹林醉黃壚誕放非古狂
匏瓜固非倫順俗豈所望土門謝惡友要若拒獠羗
革枉表斯正淳滓水乃清木貴就繩矩願言贈子行
金張珥漢貂况乃出天派石渠重儒冠武弁聊復戴
絲麻宜自任麤醜使有管蒯竹簡書汗青高吟當人籟
匏雖貴中虛植固須本大土耕戒莽鹵道耕惡疵類

革帶勿佩韋贈子絃作佩木強雖過中寧師伯夷隘
寫懷

宇宙一火宅我身寓其間靈臺真逆旅憂喜更往還
其來不可却倏去不可攀宜然閉六鑿暫使逆旅閑
中虛本無住夜半移舟山身隨事物化鬢與寒暑班
祭此業累深始知定力慳况茲塵沫聚豈比金石頑
顧影忽自笑吾心定何顏

和楊秀才友夔三首

天地有肅殺好生本無傷陽施待秋成相濟如宮商
芸芸共欣榮衆葉蕤蕤光回頭失故林蕭條弄微陽

獨有歲寒姿掀髯尚低昂流膏亦歸根晬如養中黃
大哉一氣中人心自炎涼安知晞春露不異腓草霜
秋日

誰謂方寸地并包無故新長宵不能寐萬緒愁攻人
展轉計後有攀緣及前身苦恨隙駒疾回嗟穢塗辛
被衣問何其夢覺兩不直白鳥固已空青燈聊可親
念此紙上迹皆爲窖中塵投卷嘿忘我栖雞已鳴晨

秋夜

三吳足杭秣狼戾及宋梁故爲胥門隱未辨耕南陽
豈無如雲稼竭澤歸富強收成一過眼胼胝念黔蒼

綿綿太平區阡陌盡八荒願從鼓腹游自放逍遙場
貴賤均飽煖藜藿羹等膏粱那令力田夫一飯不可望
秋郊

同餘杭尉江仲嘉褒道人陳祖德良孫遊

洞霄宮

太湖隱吏迂且頑手板柱頰看西山筆床茶竈向何
許往來洞庭林屋間舊聞西門徹懸雷故整煙艇尋
苕川却驚天柱矗雲表勢與太華爭擎天幅巾跨馬
及曉鼓逸思自覺奔春泉其誰從者二妙士金庭老
客南昌仙齊驅共語失長道但見平阪連桑田籃輿

後繼獨不語臯息栩栩山聳肩有崗回澗曲若無路萬
疊老翠漫秋煙三山對起鎖詰屈僅容蹄轍通人寰
羊腸移險在平地九疑山色荒聯綿穿松酌水尋二
洞低隱巖腹高山巔山巔石室如列厦接肘可置干
賓筵最憐西洞隔凡處凝去乳絡壁留空圓我將拂
袖去不返戲擊雷鼓揮神鞭三華寶衣立可致九赤
班符何足傳只將尻輿駕神馬豈顧家火燒凡鈿又
疑靈物之所宅外孕變化蟠蜿蜒金龍玉簡投不滿
恐復下與東溟連我嗟何地非聖處火聚正坐青雲
輶目前閭闔晝自啓電頃已超天地先正緣一念重

山嶽障破何啻重城堅就令信脚到仙宇凡骨至死
包腥羶膠膠世網浪自纏會當去之如蛻蟬誰能白
衣傍金馬且復錦袍乘釣船金庭客南昌仙他年與
我乘八景舉手少別三千年

灌竹

戶樞不容蠹展轉夕與朝死水不赴壑伐於杯所膠
人生戒甚逸起我少自勞呼僮續長綆落落鳴桔槔
携瓠傍脩竹灌灑繞百遭念此十二君竹十二竿手種離群自
江臯移栽一年餘已長數尺梢齋前雨霜叢歲久根
已交交根纏籜龍卷葉不復搖聊蘇夏日畏未謝春

雨膏蕭蕭便生涼霍若雲霧消却坐井邊石清泉濯雙
骹宮閑但數數聽以老圃嘲豈敢運甓比漫欲滋枯焦

送江仲嘉褒東還家山方將從赤松子遊

為作仙遊之詩以相步虛云

空山月出栖鳥驚濺濺暗溜山間鳴桂陰幕歷夜香
冷有人步虛聞紫清翩然騎麟下青冥君非遠遊定
方平雲輶冉冉風袂舉左右玉立花娉婷手摩我頂
一笑粲別來彈指三千齡至言不煩去畦町齒下端
有真長生忽然縱身浮太廷却笑煉砂飛八瓊採芝
方壺濯南溟秦姬吹蕭緱氏笙茫茫齊州九壑塵人

開可哀胡不聞

武夷君有人
間可哀之曲

到官兩旬四走山野作詩以自勞云

上山偃伸如望天下山偃仆如深泉胡爲持此不貲
寶來試萬丈懸崖巔前人見踵後見頂反足鳥道相
攀牽欬然置我章貢上水激石罅奔雷填荒塍曲澗
無遠近渺渺不見墟中煙土岡鑿路狹如隧蘇壁土藤
薜蛟地纏寒風颼颼失白日上有萬木蒼陰玄航溪
之深揭其淺碎石齧足聲號川茗山發我一長喟彼
有吳市人中仙飛瓊練玉存故處祇有井竈無霜鈿
我今正坐五斗米悔不辟粒從期佺向來吳松厭羈

旅三歲半逐鷓夷舩故教筦庫着踈嬾坐守兀兀聊
窮年安知求逸得奔走豈異避挺蒙戈鋌咄嗟萬事

無必計努力唯有歸園田

按圖經茗山有梅福鍊
丹竈故有飛瓊之句

吳正仲提舉至游堂

妙喜寄鍼頰大空浮海漚脩然一環堵安住有至游
內觀如寒龜無縛浪自囚外遊如渴鹿逐蹊無時休
安知至游處不止亦不流廣文來東南持節十四州
江海見函丈雲林入衣裘平生山水國不滿一轉眸
高堂坐隱几笑遣車下牛虛簷白日靜顧眄九極周
是中有至樂可以忘春秋却來觀世夢聊復憂人憂

和林德祖惠山詩一首

好山如幽士勝絕不可攀
往者天姥夢長謠愁謫仙
茲山出平野秀特無株連
招提倚雲錦森然見林巒
幽尋無十里正處閑忙澗
入門心目靜世累若可捐
靈泉出土脉汨汨無流難
茶神瀹浮乳方士沉餘丹
我生猿鶴姿頗有山水緣
何時共清賞杖屨窮崖巔

用德祖韻送毛彥時二首 庚寅

往者玉樓客棲遲感秋蓬
龍鍾江海士屑屑悲窮冬
孟郊有暮天寒風悲屑屑之句
今我亦羈旅號寒思祝融
故鄉邈千里胡馬長斯風
平生飲最少亦復賢聖中
其誰共談笑

無乃志所同伴官備文質
梗楠飾雕攏毛子亦好古
摘辭麗春工飄然適我願
一舸來自東明時獵英竒
備問羅臯忽逢辰若公等
附鳳雲從龍遙知賦伐木
相望有梁鴻 梁鴻東遊思其友高恢作詩曰鳥嚶嚶兮友之期

斷港冰未泮海風起蓬蓬
君行亦良苦浮家秋復冬
故人一相遇醉覺心形融
道舊有深樂班荆餘古風
可當度楊子起視東井中
未應迫期會促步佐一同
况當萬燈燃流光煖疏櫳
胡爲即言別繫書憑鳥工
空令千里月團團出天東
解舟動棲禽破曉啼忽忽
酒闌城西道已失銜燭龍
振衣一回首瞥去如鷺鴻

爲宜興鄭主簿賦寓軒一首

物生太空中巨細同一寓機緘固有待舟壑本無住
土儀立毫塵萬化失朝暮要之儻來寄正自墮形數
滔滔人間世俯仰若泡露浮遊皆適然蚊睫漫來去
着身方丈室聊作槁梧據了觀諸幻境內外絕欣惡
須知五蘊山今我聊託附回頭主人翁妙住了無處

君明出留題吳江詩次韻 辛卯

包山水脈通西垠森然林屋開東晨飛仙下視三萬
頃豈異滴水陶家輪時時餘浸被吳楚赤子鱖鱖哀
漂淪松江一支東入海海道今者皆楊塵遂令洪波

洄不吐禹跡莫辨僞與真滔滔利往橋下水省照黃
綬孤吟身月輪行空萬籟息尚記此境清無倫當時
苦恨無好句空負歲月臨江津得公新詩妙入理羊
酪敢方千里尊公言 御名勿作境會取捨過咎由來均

題滕司戶虛舟庵和韻

萬族同一海至人乘桴浮狂風鼓溟壑安問指與鱗
擾擾墮濁水蚩蚩守藏舟其誰善游者動寂兩不侔
紛綸萬境前了了轉處幽愛君虛舟句勿逐虛舟求
倘佯曹掾中聊作虛舟留長維五蘊山亦泳愛水流
飄搖度夷險不喜亦不憂我乃蹇淺人楠心屢招尤

君心果空曠永矣從君遊

同江趙潘集以鍾監博山爐點硯石屏爲
題予得鍾監分韻得金字鍾監蓋響板也
形製如鍾背作雲雷紋面可監我曹創爲
之銘曰癸巳作鍾監子子孫孫永保用張
有篆甚奇古

帝軒工鳧和九金童丁

御犯名

炎成婦壬戲驅豔豆隆發

凝陰雷車轉列缺光下臨飛精入範天機深四規闕明
追彘瘖厥聲鏗宏中黃林隱如霜降豐山岑豈惟正
衣冠佩簪對之炯炯生肅心應而不藏無古今監之

無窮叩逾音至人之心我所欽槃盂不須銘且箴

再分題得易分韻得醉字一首

吾觀空劫初妙蘊固無示誰令南北海七竅鑿元氣
靈龜出洪河六畫乃其寄庖犧覩天巧創物發奇秘
太虛本無邊小大隨汝視窮之得幾深見者自仁智
或從鍊丹砂或用資卜筮終然有神護回祿翻引避
絕編固冰釋覆瓿正心醉却懷投閣生寂寞發長喟
雨霽同仲嘉小酌久之雲開月出光照席

上頗發清興戲作此詩

癸巳

初月脫氛翳微雲遞踈光徘徊照庭戶皎皎涵清觴

牢愁不可排磊塊如高岡煩君着酒澆身世得暫忘
舉觴漱明月似覺幽桂香擬吹三江水浣此九轉腸
中霄起四顧何漢生微涼飄然想風馭夢寄無何鄉

過吳興城北超覽堂

佛子固多幻開軒納群山平疇展摩訶回塘縈玉環
新荷麗朝日一一發清妍引簾北窓下雲嵐揖高寒
超然醉司馬寄傲羲皇前座有眇道士長謠九華丹
張翁老篆癖勢逼之罌鷲濡毫記姓名天矯龍騰淵
日沒群動息城陰靜娟娟長林有歸翼吾駕亦言還

眇道士謂劉貧子是日
張有以篆字題名壁間

奉陪知府內翰至卞山有詩五首甲玉德泉

卞維吳興鎮傑出衆山外晴朝自生輝韞玉見竒態
新阡表南陽獨據山水會青松三萬本已復出蓬艾
靈泉發道左天遣資灌溉初無一綫溜泛濫欲浮芥
披榛佇方空餘浸忽可漕清踰金沙泓甘比中泠派
朝涵卞峯雲暮作雲溪瀨豈惟供百須旱歲亦多賴
殷勤五大夫隨喜奉微蓋有松出
偃其上嘗聞瑜瑾姿德與君
子配茲泉爲人出固是神所介當令玉德名相與流
千載

庵居

幽亭名思洛寒潭俯澄虛回頭三百年勝地成荒墟
公今草堂址無乃昔所居環之碧玉蜂帶以清泠渠
流泉響琴筑松竹皆蕭竿妙哉無盡藏一爲我娛
東岡作蘭若鍾梵鄰樵漁亦有桑柘村旁開蔬菓區
何煩引三徑故自與世踈主人去霄漢夜直承明廬
斯遊入清夢儻寄空中書

朱氏山居

嶽崎寶山麓亂石如闕獸雲根盡中空噓吸弄昏晝
茲山頗似之無乃共靈御犯如何在人境有此泉石園
深巖隱蒼翬羽竹樹兩森秀坡陀接煙磴足力恣所究

恍然天地開遠目千嶂驟中營五畝宅何必封石窳

朱公死其妻與諸子守之

桑麻無外求茶果供日富天條列僮奴花

草更黼繡生生所應有取足謝奔走嗟余四方忠老
大無一就對此寸心驚無因託圭竇

西庵

是公固麟鳳入獸不亂群吳儂欲爭席但見一幅巾
藍輿從去逋客上下寂寞濱却行共談笑媿此禮意
親行行得西庵杉竹含清薰解衣靜盤礴虛窻蕙煙
紛濡毫散珠璣咳唾不自珍曳屣轉山足長林蔽浮
雲旁連衆迤邐上有高嶙峋穹窿見深洞劃如敞重

闡往者王京子翔空駕颺輪于今蛻骨在堅重踰蒼
珉頗欲窮其源燃犀問蛇神鉤穿忽無間信有仙凡
分却尋招提路松風亦隨人潺潺石橋水洗盡荆吳
塵胡牀興不淺已覺千山曛

夜歸

日入三籟息群山鬱蒼蒼巾裾濕煙霧宛轉度澗岡
涓涓暗泉鳴冉冉松筠香林梢吐纖月露葉瑣碎光
歸來叩禪扉幽燈對繩牀相羊有餘適笑詠白雪章

翰林是日
有詩數首

同遊道場何山二首

道場山

何年窳堵波獨立妙峯頂憧憧五湖舟黑月仰光影
千章列雲犯御名靈液走甘令隆樓絕清空橫側見峯
嶺下窺三州聚塵末集毫穎振衣薄雲漢萬劫彈指
頃遼遼天宇大出沒笑蛙井堂中老比丘奮迅頗精
猛擬分數椽地飽飫卧清境何必少陵翁聞鍾始深
省

何山

謝公滄海士眷眷在林壑飛輿丁層巒及此日未落
翩然何山麓古澗謝䟽鑿方橋跨清泠鬱密交翠幄

通幽更窮深木末見楹楠琅璫鳴老屋拉攤相倚薄
莊嚴布金地藤蔓土花剥當年軒裳客小隱事鉉削
能令此山名谷口振京洛如何給園居勝士久不作
豈唯雪山輕顧恐泉水濁周行一泛覽懷古嘆冥漠
安知千載人不作來遊鶴

化鶴來遊
事見圖經

同遊勝林亭次韻

會意不在遠巢枝良有餘居然勝林境魚鳥皆欣娛
危城俯回谿歸航數風蒲幽蹊接遐觀褰裳欲凌虛
却顧容膝地清陰繞扶踈念此晨日長言旋更踟躕
翰林留新句體骨超黃初深藏恐飛去照夜空江湖

同葉翰林游虎丘分韻得丘字

四顧渺平野孤撐見林丘常疑湧地出儻復海所浮
上有千人臺靈蹤想前修無情肯深義頑石亦點頭
下有百尺淵神光千斗牛陰崖不見日草木皆先秋
兩晉多達士東亭抑其流結廬遠車馬寄此山之幽
一朝施白足弃去如毛輜矧伊桑下宿肯作賈胡留

同葉內翰遊南峯竊觀壬辰舊題詩謹次

巖韻

道林彌天辯妙譽傾斗南山陰有餘賞禹穴或已探
晚歲折舌筇杖茲焉寄伽藍呼鷹閱神駿對客手自

談却顧夸奪子心兵戰方酣當時蹇驢革蹴踏豈所
堪斯人不可見荒徑昔已諳青鞵踏松月幽燈照禪
龕尔來十五年身世猶朝三羈游了無帶飛蓬轉毗
嵐愧此石窟人堅持證那含石庵間有
道者坐禪如公世所挽明
堂要樟栴徘徊弭玉節聊酌需泉甘老乃澗底松霜
枝鬱耗耗尚有蠹書癖囊中密如蠶中年痼泉石此
外無餘耽從公恣幽討形疲意猶貪安得五畝園旁
營二空庵心游萬物表曠若巨海涵恨無買山具撫
境思髯叅却起每聞高隱
者輒傾財資之

葉翰林有徐熙桃竹方尺許索詩輒賦一首

寒禽抱幽叢意得窺綠淨天華媚霜筠慘澹若春暝
胡僧手幻藥納此方池境重重互涉入妙悟付毛穎

仲嘉錄示新齋聯句用韻書懷奉寄一首

我歌無庸歸禮意固有屬渠儂方不顧欲問何拘曲
乃知交際難不若逃空谷憂端浩無窮日飲思枕麴
文求世人笑字異山鬼哭龍鸞閱斯冰劒弩對繇鵠
鴈門既呼卿司武或見桔閉關固自如青簡得三復
誰能足趵趵憤彼手翻覆汨泥無紉轡絕迹慕前躅
故人有新詩遠寄資賸馥鳴嚶倡復和流涉斷還續
華如三女粲學陋一夔足謂夔足
一足吟餘寫幽懷蹇思慙

刻燭

夜寒大風洶洶不能寐用前韻作一首

朔風如長兵犀兕貫七屬寥寥挾霜露浩浩入空曲
羈禽無安巢凍獸吼冰谷枯摧外壓山石走塵飛翅
終朝恣飄鼓衆竅似歌哭客懷正無聊默念歎鴻鵠
窮愁巧相尋夜氣將恐枯義娥不我待始姑今已復
黃昏歌苦寒達旦幾翻復悲虫尚啾喧餓鼠時躑躅
青編置床頭芸竹有餘馥枯腸浪自苦無食安能續
平生僅識字無地寄雙足呼僮屏書眠傳記真舉燭

遷居城北蝸廬

有舍僅容膝有門不容車寰中孰非寄是豈真吾廬
不作大耳兒閉關種園蔬茅簷接環堵無地可灌鋤
不作下榻翁一室謝掃除平生四海志投老河魚枯
願從素心人不減南村居蕭然冰炭外傲睨萬物初
坐視蠻觸戰兼忘糟粕書聊呼赤松子伴我龜腸虛

北山小集卷第三



北山小集卷第四

古詩四

信安程俱



蔡州葉翰林寄示近詩次韻八首

浚治西池

世間潢潦生科斗聞說西池歲時久不應朝滿夕已
除秋至先衰等蒲柳知公旁觀久技癢聊試它年膏
去苗手泥塗不忍海波臣畚鍾故煩牛馬走嘗聞汝
水行地底出沒川源無不有濺濺忽作寫盤珠盎盎
俄承注牀酒清涵苻藻更姿媚明燭鬚眉見妍醜巢

蓮永無龜曳尾雨花定有魚頰首使君佳政盡如此
說尹遙知不容口何由步屨逐春風作社慇懃就田叟

諸葛菜

二雄未辨誰朱紫祇有群狙聊作使卧龍偃蹇正躬
耕一飽但知藜藿美平生習氣故難盡品藻蕪菁傳
錦里投醪飲河真有味置薤留根何足比要知茹草
可終身肯作染羔美搖食指公今嘯諾坐堂上方丈盈
前寧少此戲持微草調諸滄筆勢滔滔下南紀云亭
漫吏食不足幾欲送窮煩鬱壘拔毛蒸瓠當家鶩漱
石枕流徒厲齒因公始識武侯鯖蓋地何當似茱苳

茱苳車前也退之詩
榆莢車前蓋地皮

九日雨中對菊忽忽塊坐用雨中對花韻
三首

曾中有大游一室未為迫永懷東籬翁那復有此客
重陰敗佳辰長去雨不為澤堆厖對黃華菜色被臧獲
黃華亦蕭條伴我雙鬢白猶能相响濡嫩葉供小摘
去年蠶眉山痛飲真得計新蟾繼秋陽明潔謝點綴
今年坐蝸廬簷溜落空砌花開信多雨會少苦分袂
茫茫大塊間游子况無蒂百年能幾何行復驚改歲
危心如危絃未斷先凜凜風庭忽知秋中夜不安枕

力行無遠塗積縷成重錦男兒未蓋棺雅志安得寢
榮衰非所念身世固已審亦復羨久生聊爲老錢飲

魏文與鍾繇書云屈平悲冉冉之將老思食秋菊之落英輔體延年莫斯之貴謹奉一束以資彭祖之術

卞山信至三首

公昔舉阡隴二毛不勝簪扶杖事耘植呶鳴雜呻吟
耿耿霜露感遑遑蓼莪我心浮雲爲愁容鳥獸亦哀音
徘徊動行路下北元與任宿草今已長新松鬱森森
尚有五芝秀熒熒爛如金爲公賦南陔凱風吹我襟

公廬墓之生廬次道旁故有五芝之句

行雲本無心虛舟但乘流主人非逋客不使芳杜羞

鳴騶入山谷黽勉赴所求明知廊廟具豈爲猿鶴留
朝來尺素書聯翩自巖丘平安喜筠均栢寧論橘千頭
豈無木石居吾非若人儔既與世同樂那容不同憂
往客雲溪上舒娥幾虧盈深窮下山境勝槩不可名
柴車逐公游登臯復臨清夜役阿蘭若松窓待朝明
濟勝劇許掾評詩陋鍾嶸靈滋初可採龍籜忽已萌
斯游今幾時坐想飛泉鳴尚應几杖間隱隱金石聲

金石見杜子美寄聲事蘇大侍御書詩

題葉翰林閱駿圖

葉公龍友天下才當年麒麟天上來儒童抱送太一

况下游閭闔觀瓊臺高標故自賞神駿肯使餘恨遺
蒿萊帝閑食粟幾千駟盛氣勃鬱馳天街穩銜金勒
立仗下俯視冀北皆馭駘此言黃不來八龍遠尚有寫
照埋氛埃短屏高障久零落意象崢嶸求其儕收羅
絕足共一處引素便覺風沙開偉哉十馬盡殊相神
物變化須風雷騰驤振迅各有態豈顧短脰空徘徊
持韁頓轡者誰子無復墮淚鳴聲哀刷燕秣越安足
道會逐銜燭西山頽其中一驥屹不動尾垂青絲蹄
卓錮安知萬里志未已但見寂寞如寒灰龍眠老筆
不再得幻化百億紛驪駟鄭生晚出擅圖兒盛名欲

與曹韓偕肉身飛八九天去清都樓觀金崔嵬玉花
照夜不論價想見火齊珊瑚堆只今此畫已難致肯
戲秃筆雪沾殘煤千金市骨意不淺對此慷慨傷虺虺
元夕塊坐因用葉翰林去年見寄元夕詩

韻寫懷

兒童逐遨戲先春禱春晴心如飄風快目若冰壺明
寧爲惜日許所願佳節并老來見紛麗如乾闥婆城
流光不可挽譬彼空中聲那知節物佳脩然謝將迎
幽燈對簡編歷歷記所更斯須閉關卧鼻息驚雷鳴
寤念北山北田家已催耕胡爲異鄉久空寒猿鶴盟

短日良易暗凝陰有時晴何人勸之照燭燎皆爭明
今年春苦寒寒威劇幽并連綿積三白雲埋闔廬城
深泥浹新雨行路無人聲藜燈不來下箕卜豈復迎
朝來日照梁天氣忽已更稍聞橋市間簫鼓遠近鳴
吳人尚游樂急如赴春耕唯有窮巷士守窮如守盟
西安謁陸蒙老大夫觀著述之富戲用蒙

老新體作

文人意何長縱目文史足琅然五行落洞視不再讀
作書兼遠熒衆妙探玄竺公作莊頌般若頌數百篇時時歌四始笑
捧五經腹高堂發新藁重複羅籤軸觀之類窺管諷

味得膏馥

蒙老号爲連韻如云風捧諷馥

白頭書生黑頭翁長安時花幽澗松遠飛近啄雖異
志天命厚薄無雌雄鈎深采博燥喉吻守此一畝蓬
蒿宮杜門不出交二仲木陰澗曲遙相通紫囊貝葉
資藝苑欵關一見踰三冬亭亭漫吏多所歷乾死書
螢心似漆玉門賓閣不留行赭顏跣足搜泉石茅簷
正欲結雲根竹葉榴花薦餘瀝當從元亮賦言歸木
茹麻衣永投筆蒙老号爲合離藥名如當歸木筆

昨夕風月頓清獨坐中庭夜分不寐倏然
四顧寂無人聲如在塵外作詩一首以寫

一時之適

鄰家雙井桐下有幕翠庭晚來微風過已復含秋聲
歸舍對環堵筠窓亦泠泠月輪正行空洗光自東溟
常星爲失色肯與織雲并廓如淨琉璃中有玉鑑明
太虛本無滓心目固自清浩然天壤間洞視萬古情
數日春物甚麗坐閱歲華偶成古句

東皇駕蒼龍超忽了八區清明風從冰輪際轉入厚
地潛噓濡周行無間寂無迹但見動植咸照蘇艷如
醇醪入花骨凍塊一一成豐腴花光照空日色醉天
宇蕩滉青蓮敷爛霞漲淥萬堆雪剪刻不用施鉛朱

銅丸晝漏五十刻銜燭緩轡經天衢游人正與春物
競汲汲磨蟻同馳驅固知一氣共舒慘機關默動非
人須孰居無事主張是繡黼萬象歸無餘青黃赤白
豈有意應見略似摩尼珠區中代謝未有極故自有
物無榮枯

陳君學正草堂成提點大夫梅十五丈有
詩且蒙借示見邀司作謹次元韻因以叙懷
行藏固殊塗臭味非一族或莪冠攫金或被褐懷玉
持身凜冰淵或洞洞屬屬和光略畦町或落落碌碌
或來儀帝庭或去隱王屋堆豕肉生髀馳騫研重足

或委餘膏梁或不厭杞菊或翬飛千柱采錯煥金綠
或燭盤四壁分光待鄰燭要之皆幻寄眇矣太倉粟
明冥默乘除塞馬更禍福陳公作茅齋足以媚幽獨
苟全真易成知足定不辱有門晝常關何必在巖谷
向來萬金堂奔走九州牧一朝巢自焚始悔突不曲
何如東郭舍椽柱隨把束張志和築室會稽東郭采椽不斷茨以生草脩然已
忘世肯嘆碩人軸我今客吳門飢卧謝僕僕年來寄
蓬茨慕此高讓俗夏統傳有夏禹之遺風泰伯之義讓室中了無藏鼠竊屢
驅逐衰懷百念冷對境無可欲窮通如四序損益正
三復衡門可棲遲薄酒等醅醪吾聞老聃言爲腹不

爲目

近遭小寇故有鼠竊之句

十月五日集季野家歸作

賢愚孰無營急景信可惜如何闔廬城乃有此閑客
懷安豈初志運甓有餘力相從無何鄉邂逅一自適虛
窓得朝陽寒凜作春色琴書羅斐几一淨如拭畫沙
見竒蹤落屑非近識似追永和還未覺正始隔崢嶸
衡霍囿莽蒼雲夢澤時華玄低叩幽鳥共深寂誰驅
此變幻戲納方丈域慙公傾春釀澆我憂思積豈無
車公語謂方顧匪伯仁匹謂自長檠蠟華摧起視霜月白
酣歌美清夜擁髻侍通德參差吐幽妍鑿落灑芳碧

觥籌不留行爲問此何夕言歸謝主人五斗安可極

戲示江協律漢

酸寒北山尉樵粹孔州守枯魚同處陸濡沫賴詩酒
當時年尚壯意氣亦何有祇今雙鬢華十載一回首
任初君似遇遊倦吾已醜邂逅記昔遊空嗟漢南柳

再和一篇以荅固窮之句

車行有險夷初不入天守乘顛了無擇正自全於酒
我身天地間毫末寄九有正當帶笈簪章甫誤加首
又知田園樂不信村野醜平生笑何人戚戚柳州柳

江再和戲荅四篇

當年李將軍晚節河東守誰令一人譽揮去坐使酒
長卿起遐陬落筆賦烏有要之乃雕篆意不在黔首
窮通付造物世俗浪妍醜何必送五窮呼奴結車柳
長言屹秦城古例開墨守三年不窺園一吻莫飲酒
斯人浪自苦初不繫無有何如從子微亦復問賢首
此身未能了何暇念億醜超然方丈間觀化肘生柳

右二篇
寫懷

君家翠嵒翁三夕已守與沈愛欲泥寧飲聲聞酒
當知華藏海正在十二有他年涅槃門無路須北首
胖然一心定六賊如獲醜感彼志冰霜吾衰等蒲柳

右一篇
屬仲嘉

太平一春臺好在四夷守持盈何足道飽德醉以酒
君爲樂歌詞嘉瑞無不有不知府中士誰子號稱首
如君具嫵媚孰謂施媼醜故應洗餘累令君繼溫柳

季野見和次韻二首

季野與予嘗爲左
右史先後知潤州

談遷太史令趙衛淝西守妙齡中青錢大筆笑元酒
一麾分隼旗七載去螭首行看賈生還固異顏駟醜
何許從宸游金鞍繫宮柳

此身非匏瓜圭竇可長守初爲弦歌計肯飲中山酒
深虞委司敗政術空無有故將老衡茅敢復歎華首

公詩金錯刀刻畫無鹽醜應憐五霸韓定作三黜柳

次韻葉內翰游西余山用袁奉議韻 甲辰

平子愧明略長卿真倦游
參省儻可佩瑤玉豈復舟
舊聞西余老猖狂白蘋洲
毫端寶剎見塵起大地收
奮迅師子王蚓蛙視蛟蚪
向來大滌翁晚節萬戶侯
襄陽一轉語富貴真雲浮
此道久已微砭砭混琳球
念昔過苕霅尋谿亦經丘
同游今安在十載一瞬眸
嘗與江仲嘉至西余幾欲挂長劍
刻舟笑延州焉知甕瓦中
人寂默無春秋香爐着古廟
一念萬劫休安得五畝園
良苗接平時脫身飢寒外
結及高勝流二邊無餘習
六賊

可盡劉誰能使危腸一日一萬周須公謝三旌故事
追羊求青鞵一幅巾來往山之幽且復載明月深潭
戲垂鈎

次韻江司兵寄示所和趙司錄相從飲解
嘲之句

卜居林塘靜禽魚樂融融陽和一披拂照爛黼繡工
柔條冒繁枝幽香來晚風誰謂武陵遠臨清千樹紅
俯仰村郭間從容聖賢中暮見月圓缺餘光入疏櫳
朝乘日車作坐守四壁空遙想趙與江屈身簿書叢
正類鸛雀碧未爲覆盆烘祿隱寄簪笏神游在方蓬

時時望西山把酒一笑同茗盃傾石鼎山蔬出筠籠
不妨問中聖何暇賦惱公趙子五車腹春秋富終童
居然出其類儼如黃髮翁江子事超曠叮咛漫無封
但見磊砢姿温温若春濃人生迭相笑傖父嘲吳儂
鳴夷與井竝憂樂殊初終具當從所好迂轡若爲容

空相僧舍書事

癸巳

午景入踈竹堂陰筠粉香疏簾撲空翠無風自微涼
碁聲破禪寂日轉幡影長霏煙觸垂瓜泛乳搜枯腸
投局起尋勝徘徊雨花堂巢蓮見靈龜信有千歲祥
徐觀乃跛鼃圍圍循菰蔣笑罷得歎息是非可兼忘

却坐對談塵冰松想千章斯須二三子矯若驚鴻翔
府中有料理不作功曹狂杜甫為功曹云東帶發狂大叫簿書何急來相仍是日江趙潘以幕職事去

戲贈江仲嘉司兵

君不見謝公栖遲樂東土起作司馬征西府莫年談
笑有穰孫鶴唳風聲走強虜又不見子猷剡川高興
闌肯隨鶴書落人間不知騎曹底官職朝來柱頰看
西山平生清真翠嵒老泉石膏肓偶同調歲寒落落
見孤松不忍低眉寧枯槁年來無米繼朝炊聞說吳
興富魚稻不妨來作古同兵士卒投醪止鳧藻美哉
洋洋雪溪水秋塘百里荷花繞當年釣徒放浪處醉

目悠然送歸鳥斯人不死世不識徃徃凌波弄瑤草

君方叅同

犯御名

龍虎我欲治

平

荒種黎棗會當月夜

見庖眉一笑超然凌八表

張志和自号為江湖釣徒

次韻和江司兵蒞江觀潮

寥天月魄更旁哉歸墟兩潮時去來乃知大塊與人
等欠噫風動聲為雷支川千億具毛竅四溟翕張玄
乳開人閒百刻乃一息斷岸飄鼓如輕埃二山橫控
江海際俠以幽闕雙鬼鬼偉哉吞吐王百谷視彼淺
狹真臺陪倒流千里駭凡目止自違性同捲杯相傳
昔者楚亡將事成國霸遭雄猜英靈不沒尚為尔姓

字往往欺啼孩錦鄉功臣老元帥酒酣拔劍歌莫哀
戲令強弩飛勁前大堤屹立藏風桅吳兒荒怪不足
錄適與支諾資談哈豈知六合有常理水中出火能
焚槐當年謝公正游樂遺形物表如王駘微吟獨嘯
向海道幾見銀雪西山回讀君新句寫竒觀便似放
自吳王臺何當共此散煩鬱大瓠五石充瓶壘更因
長風破巨浪與君挂席尋蓬萊

送趙子書奉議歸睢陽用熊倅韻

紛華眩人劇朱碧子獨好書如好色王孫被服甚寒
生射策君門先破的滎州書窟三萬卷錦囊付此庵

眉客南游句吳北大魏亦復徒勞問刀筆不唯唇齒
腐經史正自雲山鏢膏臆老來息交思簡事爲子忘
劬廢晨昔春風滿帆送歸舸回首清游如昨日知君
名駿定千里不待朝廷訪幽側有書時寄鴈南飛顧
我漁樵正爭席

同趙奉議離吳興江仲嘉與其兄仲舉送
百餘里醉中戲作此句一首

大江飲酒如澆灰小江縱酒顛如雷扁舟相送不道
遠百二十里雲帆開云亭老人窮不死故園茅屋荒
蒼苔闔廬城中一畝地已辨甕牖鋤蒿萊吳興上佐

吾黨士十年縱賞西王臺眉間黃色袿綵服拖樓長
嘯春風回要須酪酏酬此別不離萬頃添金杯明朝
相望即湖海縱有美酒何爲哉

蝸廬有隙地三兩席稍種樹竹已有可觀

戲作七篇

吾聞鄴侯國產菊千丈潭采華食其葉垂根漬芳甘
遂令鄴川氓難老如彭聃庭前有古井秋霖發清涵
慇懃東離綠覆此白玉盞時能嚼新藥汲月散餘酣

菊

種玉未渠久踈篁長兒孫勝會不在多何須辟疆園

我觀榛蕪地塵思紆且煩蕭森對此君清涼徹心源
草木初無情妄作淨穢觀乃知識種子正是生死根

竹

微華若么鳳倒挂茂蔚中鳴鳥不可見幽懷寄芳叢
初移幾寸苞稍展兩翅紅能使寂寞濱餘妍映蒿蓬

鳳仙

峩冠百草頭意象出其類望之似木鷄正自五官廢
寧須斷其尾無乃假予臂可復近幽窓談玄有深詣

雞冠

嘉生苦不榮凡草忽猥大君看庭中覓易長劇稂稗

初無封植意不見蟲鳥害穰穰
筠菊間紅紫不可殺
微功尚足收染我槃中菜

紅莧

芭蕉中無堅譬彼泡夢幻了然觀我身生死知一貫
學書端未暇覆鹿真自亂一雨過空庭秋聲入深宴

芭蕉

水青雖楚楚不復中棟梁黃封入雕檻亦足被寵光
朝離糞壤區暮上君子堂胡爲伴幽獨墮此一畝荒

水青

黃嘉父朝請公彥示詩以不數面爲言且索

近著次韻謝荅一首

黃公游不成白髮奉朝請東歸樂間燕有味如雋永
雙鳧倦朝飛獨鶴方夜警知余亦衰窮繫馬無復騁
貽詩重瓊玖未展意先領勞生厭塵霧對此得暫屏
終當遣長鬚亦復釣縮頸相過舉清觴野水吹萬頃
君當傾錦囊我亦倩毛穎時尋招提勝蓮社比宗炳
如何迫寒餓去掉聊一轂正興盡即言歸江湖足佳景

和楊彝甫靜妙軒

君家執戟郎寂寞墜土天祿蕭然劉董外那用相窘束
居無甌石儲但有書滿屋君今老衡茅出處異蘭菊

靜中獨觀妙四達開惠目中園鬱黃華庭下森翠竹
飢來索盤食小極須睡足時當叩君門爲問梅子熟

過毛達可友給事覽壁間舊詩次韻二首

堂前清颺發樹外赤日西坐今天壤間氣候忽不齊
解帶席嘉蔭長哦壁間題故應有神護塵土不得迷
前年款公門鷄鵠亦已啼今年復羈旅庭莎欲鳴鷄
西游有底急觸熱忘卑棲似爲飢所驅不計輟與蹄
綈袍意弥厚槃飡洗羹蒸磊塊久不澆醇醪代朝齏
襄陽之新句夜直難相携

黃華非不佳寒澹每見少蕭蕭亦無言懷抱不自曉
深嫌小桃天欲伴霜松矯窺叢慰寂寞時有南飛鳥
主人真賞竒灌植勤便了徘徊傍東籬高興在塵表
坐有白頭生臨風百憂繞

北固懷古

阿瞞長驅壓吳壘飲馬長江投馬箠英雄祇數大耳
兒彷彿芒碭亦龍子幄中况有南陽客布衣躬耕無
甌石當時鼎足計未成聊此一竒空赤壁人隨流水
去不還卧羊頑石留空山如今留石亦煨燼山與長
江相向閑

焦山

龍伯不解事投竿牽大鼇逆流直上三萬里怒卷渤
澥秋風潮適當長江入海處負負擲此雙岩堯一山
正臨聲利窟來檣去櫓紛舸艚一山獨與世踈闊突
據幽險盤雲濤飛仙播蕩去不返止有一翁身姓焦
至今金玉作山骨草木堅勁無天條尔來寂寞幾千
歲稍見遊子來山椒吁嗟一與人境接世故擾擾如
牛毛安得夸娥還着鼈背上因之置我三山高

和葉翰林湖上夜歸古句

琅玕一紙傳青桐西湖默存清夢中遙知湖上發新
倡几馬一洗煙雲空翰林文章舊驚世聊試三輔分

符銅玉槃無聲轉清夜水天交貫冰瞳朧况聞許下
足名士獻詠鼓舞馮夷宮擔簦獨欠此狂客顛顛企
踵臨西風朝來珠璧入懷袖坐想星宿羅心胷自憐
華髮烏帽底俯仰正慙張長公何當從公萬物表妙
契不待將無同展書三復更太息但見缺月穿疏櫳

俱初約造門
當在中秋

北山小集卷第四



